



كبرنا بنكره التفاح



01007677910 - 01111883712



3aberorg@gmail.com



www.3aber.org



عابر 3aber

جميع الحقوق محفوظة، وأي اقتباس أو إعادة طبع أو نشر في أي صورة كانت ورقية أو إلكترونية أو بأية وسيلة سمعية أو بصرية دون إذن كتابي من الناشر، يعرض صاحبه للمساءلة القانونية.



كبرنا بنكره التفاج

شعر: محمد البشبيشي



obeikandi.com

الإهداء

إليها وحدها قبل كل شيء، الجميلة التي أحبها حتى ولو كانت لقاءاتنا
كلها في المطبخ
إلى التي لا أستحق أصغر جزء بإمكان المادة أن تنقسم إليه من حبها

إلى أمي «صفية»

إلى رفاق الدرب
من قد امتزجت روحي بروحهم إلى إسلام رمضان الشاعر الشاعر من
سلالة أهل الخسارة!
إلى تلك المهزلة المصنوعة ببراعة!

هل توقعت المزحة التي ألقيتها على صديقي
البارحة؟! آه نسيت أنت تكتب كل شيء، يا
لك من مهرجٍ عظيم فكل الأشياء تضحكني في
هذا العالم!

ويا لك من محب عظيم أيضاً، ولكنني لم أرى الضحك والحب في واحد من كتبك ابداً.. لماذا؟!

- محمد البشبيشي

أحيانا يصبح الشعر عندي بديلا عن الإنتحار

أمل دنقل

﴿وَأَنَا لَا نَدْرِي أَشَرُّ أُرِيدَ يَمَنَ فِي الْأَرْضِ أَمْ أَرَادَ بِهِمْ رَبُّهُمْ رَشَدًا﴾ ﴿١٠﴾

«الجن ١٠»

- بابا! أريد أن أكون بهلوانًا

- كنت أنتظر هذا، أعلم ان جدك كان بهلوانًا ذائع الصيت؟

- كيف بدأ يا بابا؟

- بثلاث برتقالاتٍ، خبأها من جدتك حتى يئست من ظهورها. ولما
يبست البرتقالات أظهرها وبدأ يلعب بها، أتلفها حتى يقطع رجاء جدتك
منها؛ برتقالات تالفة لأي شيءٍ تصلح سوى للعب. لكن تعال هنا وقل لي:
لماذا تود أن تكون بهلوانًا؟

- أسلي نفسي، لعب يا بابا لعب

- المهم أن تتقن قذفها بالتبادل فلا تسقط إحداها

- بسيطة يا بابا

- آه! بين حينٍ وآخر اطمئن أن رأسك بين كتفيك، كثيرون اندمجوا في
اللعبة وحلت رؤوسهم محل إحدى البرتقالات

- طيب، وماذا لو كانت البرتقالة تصلح بدل الرأس يا بابا؟

آه... بدأنيا يا ابن الكلب بدأنيا

- لا تغضب يا بابا، دعك من البرتقالة، أتحب التفاح؟

obeikandi.com

القضمة الأولى

في البدء
كان ابن آدم طير
والسما دير
والمطر ألبان
وكانت حدودنا
تفوق حدود الجان
وكان كلنا كروان
والبنت كات فستان
وكان
جميع أنواع الأكل كحك
وبعض سر اللحن ضحك
وكان عندنا عش
أساسه في السموات

وعندنا بنغش
المّية باللبنات
خفاف وزى القش
وسحابنا غزل بنات
وف يوم طلت حبيبي
إيديها حضناها
شايلة خيال بنتي
وعنّية ضمّاها
وكانت حبيبي زي حبيبي ماتتوصفش
وأنا والي زي
زي القهوة من أول شفطة
بيتغير لون الوش
أنا والي زي
بنحب
مفيش في إبدينا درع
حيننا نقصنا ضلع

كبرنا ونقسم التركة
وعشان بني آدم
الورث كان شهوة
في البدء حد
في البدء ألف حدود
لما الجناح يتهد
يبقي البراح محدود
في البدء رمل و دود
وألف هم ودم
وكم م الغربان
مسدودة كل الميخان
أنا واللي زي
اتعودنا نبكي حبر سري
هنا الهوا بلاستيك
والبرزخ سرب أملاح
أنا واللي زي كبرنا بنكره التفاح!

القضمة الثانية

في البدء
كان الشجر حي
والضي حي
والشبايك
وكل جامد حي
وشوفت الكراسي
بتخر دم من مساميرها
وشوفت ابن آدم في سفه
والحب
مجنون بيكتب قمة الفلسفة

أعرف روائي
كتب خمسن رواية من خمسين سنة
مافضلش منهم غير قصيدة وحيدة
عمره ما قالها
هو الحب
يشبه قصيدة الروائي
في صالة رقص
على موسيقى لموتسارت
كان كل واحد
بتنصهر إيده في إيدين حبيبته
ما عدا اتنين
الارتباك والحجل سيد المشهد
ورعشة الحب البدائي
مازالت طفلة في إديهم
هو الحب يشبه لهذي الرقصة الي ماترقصتش

أو كواحد اكتشف توأ
إنه بإمكانه البكا
فضّل يبكي
حتى انتهى جسمه
مافضلش منه غير عنين وخذ
هو الحب
يشبه لروح الورد.
هو الحب
إن تنبأكم السجاجيد
عن وجع السجاجيد
وبرد في الشراشيب الأصابع
إن تفهموا حزن الفساتين
على الفل الي دبلان من فوقها
ألم الكراسي م المسامير
ألم المسامير م الشواكيش
والعكس

هو الحب

حسنة في ظهر حبيبتي اشتكت لي

إنها في مصر

ماشفتش ضوء الشمس

من عشرين سنة!

إذن

مش حقيقي إنها تكون ظالمة يا صديقي

ومش مطالبة تكون بهذا العدل

هي بتشبه

سحابة بتبيكي

أرستقراطي صحا حبيبته

وخدها تحت المطر رقصوا

قال لها بحبك وباسها

ف حين كان هناك

بأش فقير

متغطي في جلده

السحابة لا قصدت تفرح الحبيين
ولا تعرف البائس
كل الحكاية
إن السحابة حزينة
وحده الي كتب القصيدة الي يعرف
او ممكن يكون السحاب
هو البطل في القصيدة
وإحنا
إحنا بالفطرة، مانقدرش نقول:
إحنا البني آدمين الهوامش
لكن، نقدر نقول:
إحنا السحاب الهوامش في دنيتنا القديمة
وإذا أراد السحاب إنه يكون البطل
يبقى يصير اسمه ابن آدم
إذن فالتمسحوا خيوط العنكبوت بالمناديل إنها الحيطان بتبكي!

القضمة الثالثة

أعمى بيهدينا الطريق
على قد ما بنحلم
كات الحياة بتضيق
فازاي تكون شاعر من غير حبيبة
يكفيك صديق بيحب
أنا شوفت كل الخلق
بتدور عن حبيبة
وأنت الوحيد
بتدور عن حكاوي صاحبك الأسمر
وبتنتشي جداً
لما بيقولك:
إنها ضحكته على كوبري قصر النيل

في الليل
بيدور في ذهنك
كل شيء تتخيله
غير جمال القمر طبعاً
أو صوت آدان الفجر
في الليل
بيدور في عقلك كل شيء
إلا هذا الليل
بتوشوشك نسمة
خارجة من خصلة بنت عانس
فتكتب قصيدة
عن ناس
كل مشاكلها في الحياة
إن عامل في جنينة الحيوانات
أكل أكل القروود ولازم يتعدم

في الليل

وشك بيشبه لوش القهوة في الفنجان

من غير ملامح

كل همك ازاي هاتضحك

إذا حسوا الوجع جواك

عينك الثابتة على أنفاس أبوك

رعبك مع كل تنهيدة

إن دا آخر نفس

خلاك تعاتب ربنا جهراً

بتقول:

صحيح أعمى

لكن بشوف الروح

الروح هي

الدمعة والضحكة والاغنية

الروح هي
الحطة البيضا الضي
الساكنة قلب الصدر
بتروح لي معاه السر
الروح أي
أي الي شائلة فوق كتافها
أربع ملايكة
وما تعبت ولا ملّت
أي الي ضلّت
وهي بتهديني الطريق
ورغم إنها طول عمرها عاشت بتغزل إبنها من صوف لكنه عاش بردان
الروح أبويا
وأنا فاكراً أبويا
أيام ما كان آدم
ونزلنا في البيت القديم

ومع إن كان جنب الغراب عصافير
اتعلمنا ازاي ندفن الكلمة في صدورنا ونقول نشاذ
وماتعلمناش نغني أو نظير
الحزن فينا
وكأن طول الوقت ناي
ومن ساعة ما قالوا إن الطوفان أهو جاي
غرقت الناس في الهوا
م الخوف
ومع إني الضرير
أول من آمنت بأبويا
لم ياخذني معاه أشوف
أبويا الي شاف ربنا
وشافه
أبويا الي باني البيت وطافه
حرم علّية الصلاة

أنا الضرير
 سايبني أخط في ترايزات وسط البلد
 واسمع لواحد كل فلسفته في الحياة
 إن انت بالنسبة لواحد
 موجود في شمال كومومبو مش موجود أساساً
 فاصعب عليّة
 وأبص ع الصورة وأقول
 دا أبويا
 ازاى سايبني كدة في هذا المكان
 أبويا اللي في إيديه الشمال الشعر
 وفي اليمين قرآن
 ازاى سايبني كدة في هذا المكان
 وبرغم دا كله
 ماشوفتش أي شيء مربع
 قد إن الأعى
 عنده طول الوقت
 ل ي ل

القضمة الرابعة

كنا في نوفمبر

وكان ساعتها طويل

والشتا داخل بوشه المكشر

ودمه الثقيل

والبرد فارد سطوته ع الورد

كل اما الريح تميل يميل

.....

هنا عيد ميلاد النقص

وحاجات كتير وحشة مانوعالهاش

وحنين لحاجات مانعرفهاش

♦ مشهد إباحي

لطفل بيعدي الطريق من غير ابوه

لو تسألوه:
نفسه يطلع إيه
هايقول في سره
تشبيكه إيد مابتفكش
لكنه ماردش
ماكنش زي بقيت العيال
يلعب الكورة الشراب
ويشتري السكر نبات
كان وحيد زي صحرا
كان بيبي في مشهد
لاتنين بيبوسوا بعض
بعضهم اتهموه بالجنون
وبعضهم ماخذش باله غير من المشهد

لكن الحقيقي
دا كان حنينه
لأول مشهد يشوفه
من خمستاشر سنة
لاتنين بيبوسوا بعض
من غير ما ابوه يعرف
كا يغني ورا الكروان
ويعشق م البنات فستان
بيستم من تعاليم الهلال
كان يقول لحظة ميلاد الشيء
لحظة ميلاد النقص
كان يتحد والريح
ويعلموا ضي الشموع الرقص
كان بيعشق من هنا للشعر
مش عشان السما
نزلت هنا مرة

ولا عشان القمر
فارد ضيائه بطول الطريق
لكن عشان هي
عدت من هنا مرة
وسابتله طيفها صديق
كان بيكتب ع الورق
كل الي مش ممكن
إلا شجرة التوت الي ماطالهاش
كان يقول كل شيء عشناه
غير البكا والغنا والضحك
ماعشناش
كان يغني للقمر
ويبعث مراسيله الغريبة
برغم المسافة وطول السد
كان يقول:
صحيح كبرت وعرفت اعدي الطريق وحدي
لكن ماعرفتش اعدي الطريق مع حد!

القضمة الخامسة

مولاي
هتفت حتى تلفت
لا خوفت
من لسعة نيرانك
ولا ارتجفت
وقفت
لا أدري فين بيبانك
نزفت
من قلمي لراسي
كشفت لك روحي
ما انكشفت ♦

صرخت
أتشققوا أربع شفايف
اتفرقوا ذرات ولايف
ودبلت وردتين
وسال اللون الآدمي مني
فكيف أكون منك
وكيف تكون مني
ولا تسمع نواحي
عبرت لك كل النواحي
اتنظورت اعضاءي عني
أنظر وشوف الخوف في عيني اقسم بإنك هاتشك إني من صنع غير صنعك!

القضمة السادسة

في بلادي
وأنا ماشي مع واحد صربي
على حسب العالم ما اتفقوا
مالهوش بلاد
أنا كنت شريكه
في المآساة
والآه
وعلامه الزمن الجلاب
على قلبه
إذ قال لي:
لكن أنا عايش على أمل إننا نرجع لبلادنا يا محمد
إنما انت عايش على أي أمل؟!
إن كان لي بلاد
أنا بلدي أسوء
من أي مكان

في بلادي
فيه كمان ورا كل حدث
إذا كان في بلاد ثانية
منع المحتل الاغنية
فانا بلدي بتقطع في حناجر
كل الأطفال المولودة جديد
وتبص لقدام
وأنت لسة بتسأل
يا حمام بتنوح ليه؟
أنا بلدي لم تعمل زي بلاد ثانية
منعوا الخوارم الرقص
أنا بلدي بتجبرنا على الرقص
شوفت الفراخ المدبوحة؟
العالم كله في بلدي بيتنطط في الشارع
وأنت لساك بتصارع

أنا شوفت اتنين

كانوا بيتناقشوا

إذا واحد فيهم مَوّت نفسه

وسألوه فوق عن سبب الفعلة

هايقول ايه؟

”والله ما كنتش بلاد الله واسعة“

متخيل شكل الوضع؟!

الموت بيراود كل ولا آدم عن نفسه

وانا عمري ما خوفت من الموت

لكن مشكلة الموت في بلادنا إنه شوفت العطسة

اللي تجيلك وقبل ما تعطسها تروح

أنا كدة عايش

لكن على أي أمل؟!

القضمة السابعة

تأنجو الحرية.. اهداء للمطرب التشيلي «فيكتور جارا»

تشيلي لسة طفلة

مش من الصحي إنها

تسمع اغنيات بالعنف دا

...

ماكنوش جنود نبلاء

ماكنوش خصوم شرفاء

...

طلع المغني م القفص

على ميدان تشيلي الكبير

عشان تعرفو بس

عساكر تشيلي مابتخفش

من الغنوة

ادي المغني أهو

غني غنوتك الأخيرة

صّحك عساكر تشيلي

نزل المغني بيعرج
والنشيد مكسور في بقه
نفض هدومه
من إيقاع السجون
ووقف في نص الكون
أقصد في نص الميدان

فتح عنيه بإديه
عنيه اللي ماتفتحتش
من يوم ما اتسجن
عنيه اللي تقلت
من الحنين والذكرى
لميدان تشيلي
وانسابت من عنيه دمعة
لا اراديا
تسقي النبات اللي مات
في ميدان تشيلي
وكل تشيلي واقفة مستنية تضحك

وقف المغني بجاكتته الصوف القديمة

والدم نازل

من أماكن عدة من جسمه

ميل وعبي جيوبه بتراب الميدان

وغنى

وحنان كل اطفال تشيلي

مستخبي جوا صوته

وغضبهم جوا صوته

وفي موته الشباب

شباب تشيلي

بدء المغني غنوته

غنوة أليفة

وكأنها اتربيت في كل بيوت تشيلي!

غنوة مخيفة للعساكر

وزي الفلسفة شرف العساكر

في الكتب ورس

قتلوا المغني

وتشيلي مابتضحكش

تشيلي بتردد وراه

قتلوا المغني

وتشيلي بتردد ورا طيفه!

القضمة الثامنة

من
مخدته القطن الوحيدة
بناها سرير
ولسة مش سامع
غير صوت مواءها الميرير
كنا أنا وهو
شاهدين على المآسة
قطة مجهولة المصدر
ومجهولة المصير
على أرض حارتنا الطيبة
واقعة من الدور الاخير
وأنا وهو
لسة شاهدين على المشهد
ماعرفتش أضحك على نفسي
وأنزل دموع
لكني
للأمانة حزنت

أما هو
فماكنش شاعر
فتحلها
علبتين تونة
وكوباية اللبن الاخيرة
الي يملكها
ونايبه من الفراخ بتاع بكرة
وقعد جنبها يبيكي
ويسألني..
نقتلها؟
وأنا
لأني شاعر
طلعت ورقة وقلم
أكتب رثاء

القضمة التاسعة

حبيبتي

خلص الكلام الحلو.. هج

مافضلش غير الكلام الفج

في الليل

على إيقاع الضوء الأصفر

الي يحيل لك

إنه

فاضح كل الأشياء

وساترها في نفس الوقت

وبريحة أردء أنواع التبغ

المخلوطة بكبت ورهبة

وخوف

وفي جو مميت
يسمح لي أني استكشف
عرض الأوضة بتاعتي
تسع بلاطات
وف زاوية الحيطه الشمال عنكبوت
وف درفه الشيش اليمين
خرم يسمح
لبقعة الشمس
إنها تخلي
وردة على السجادة أجمل
بعد ما شوهتها بقعة الشاي القديمة

وكأنه منظر هرب
من لوحة لأنجيلكو
وكعادي وشرقي
بتثيره الملايات
وحملات الصدر
والمخدرات الطويلة
بهياً نفسي لممارسة العادة السرية
وكمتمدين جداً
بوقف كل النشاطات كلياً
لحين ينتهوا من آدان الفجر!

القضمة العاشرة

هي

وما بين التوت والموت بتتخلق هي

في ليل في الاصل

كان تنورة ملاك راقص

في السما السابعة

وفي عز اللف

وفي عز حوارى الحتة

بيتنا بيقول للعشة الي قصاده

اعملي بيروية

الحب كان اسهل من المية

والقلب كان ليا

والقلب برضوا ليك

شباكي كان اشقى بيعاكس الشبابيك!

القضمة الحادية عشر

حتى العياط
في الوقت دا من التاريخ
مش سهل
امشي بسرعة
أو على مهل
مش هاتوصل لشي
الطريق مش دايرة ولا مربع
كل الي عديته
عبارة عن
حتة بتتشال من وراك تتحط قدامك
وعاوز تعدي
حط عقلك في قلبك
وحط قلبك بين وراك

في الوقت دا من التاريخ
من غير أي انفصام
هاتأذي نفسك
إذا وقفت قدام مصالحك
حاول تصرح للأجنبية
من بلاد التفتح
إن معرفتك عن العلاقات
تساوي معرفتك عن الآلهة
هاتتهمك بالشذوذ
ظروف بلادي تقتضي
إني أكون شاذ جنسيا
في سبيل الوطن
والعرف
وعدم خدش الحياء العام
فعدراً أيتها الأجنبية
إنتي ماتفهميش أي شيء

الطريق مش دايرة ولا مثلث
حتة بتتشال من وراك
تتحط قدامك
يعني إيه حرية في حدود أي شئ
تبقى حرية من أنهي اتجاه
صديقتي شجرة الموز قالتلي
إنها لها مطلق الحرية
تطرح موز أو ماتطرحشي
لكنها ماخترتش تكون كشجرة موز
وأنا يا إلهي الرحيم
يا خالق المنطق
بشاورك على المغالطة المنطقية

خارج حدود الثورة والشعارات
لمصلحة شخصية بحثة
أوعدك بعدم تحريض أي ابن آدم غيري
أقبل عدم وجودي في هذي الحياة
أولو لا بد لشيء حولني لأداة
لحبة هوا تحت مناخير بنت
مافتتش من ضمة حبيبها
لوردة في بساتين
موصلهاش بني آدمين
لأي شيء مايبحبش
ولا بيحن
ولا ليشعر بالألم
أو بيشعر أساسا

الطريق مش دايرة ولا مثلث
حتة بتتشال من وراك تتحط قدامك
ومن نصيبك
بتسقي زهرة مونساك في طريقك
وتموت في نص الصديق
قلبي جوا قلبي غريق
وأنا لما بصيت في عيني حبيتها
فيه جوا قلبي درجة من الازرق
مش موجودة في الواقع لكني حسيتها

حبيبتى تشبه
لكل البيوت اللي عزلنا منها
وأزاي لهذا البديهي
سريري مثلاً
سندتي على الشباك
كل يوم الصبح
متعمد أخلي قلب أي يقف
كل هذا اللي من حقي
عمري ماكنت اتصور في يوم
اعدي على شارعنا
اللي ماملكش فيه أي شيء
لكن لا اراديا لسة بقول حبيبتى أقصد شارعنا
وابصع الأوضة من الشارع
وماملكشي غير البصة دي!
الطريق مش دايرة ولا مثلث
حتة بتتشال من وراك تتحط قدامك

القضمة الأخيرة

تاھت مراكبنا
تاھت يا عمي
فين صاحب الإنسان
يشوف إنسانه فين؟
ھمك على ھمي
نونس بعض
وماليش غير أنا
في البرية
ماليش غير إني انقسم عني
واھيم واياي
وأغني

واسأل عن السنين
عن السنين الي ضاعت
واسأل عن الحنين
عن الراعي الكبير
مش برضه مسؤول عن رعيّة
زهقت م الحكمة الي مجهولة
ومن ضرب الكفوف ع الكفوف
ومن ضرب الدفوف
وأنا أهلي ناس طيبين
بيحنوا وبيحبوا
لكن من غير لا حركة ولا مجهود

وانا طبعي ماليش في الركود

سبتهم

ومشيت على الكورة

أدور على الحبل الي مربوطة منه

كأنه شفاف يا أنا

ولا أنا الشفاف

يا ولاد قابيل

ماكنتوش خفاف في الدنيا دي

ولا سيبتوش غير اثر مفزع

يا ولاد قابيل

يعني إيه انسان؟

يا ولاد قبيل

يا قلب منزوع الحنان

جربتكم

وهجرتكم بالإرادة الحرة

عابر ومجهول
السلالة والنسب
والسيل
بدوّر عن
صديقي
وأنا صديقي ماعرفوش
من نسل هاييل
أنا حبيبي
مابوستهاش من نسل هاييل
باعتلكم
من أكبر مستدوع للنفايات
والحقد والدم وجثث الحيوانات واعضاء ولاد قابيل
شوقتو ماكناش نقصدكم بشر
ولا بينا وبينكم تار
ولكن دي طبيعتنا

يا جنس هابيل، فالتنم، ولتشرب وتأكل
فالله يبتسم لك عن رضى

يا جنس قابيل، في الطين
فالتزحف ولتمت في بؤس.

يا جنس هابيل، تضحيتك
تدغدغ أنف الملاك!

يا جنس قابيل، ألن يكون
لعذابك نهاية أبداً؟

- شارل بودلير "هابيل وقابيل"

ولأنه لم يتعلم، مد يده وقطف تفاحة ثانية!

obeikandi.com

القبلة الأولى

ياريتني أعمى أشربك باللمس!

- فؤاد حداد

أول مرة لما حزنت

ما بكتش بالشكل الصحيح

كان واقف أبويا خجلت

ومن يومها

في دمة محشورة

تحت جلد الخد

وربك

لم يخلق العين بتعطس يا صديق

أقولك:

رغم فات عشرين سنة

ورغم إن فيه بنت حضنتي
والله حضنتي
صورتها
وهي بتحدف قلبي في الهوا
كان كادر مدهش
وقولتلها نكتة
ووعدتها بكيس فستق
فحضنتي
ساعتها ارتبكت
قلبي نط لتحت
كل الحواس دخلت في بعض
بحق القلب فكر ساعتها والعقل دق

لسة باستوعب
وهامد إيدي وأرد الحزن
كات هي بتشيل إيديها وتنسحب
لا إراديا طبطبت على كتفها
ضحكت علّية
أنا نفسي كل ما بفتكر
بضحك علّية
وبرغم إن علبة سجاييري لسة كاملة
والشاي بنعناع ماخلصش م الدنيا
وأمي لسة بتبتسم
ولي صديق مخلص
أعمى وأخرس
لكني حزين!

القبلة الثانية

ولو كان صوتك وحش
غنيلى...
وافردى شعرك على حجري
وقوليلى...
قوليلى شعر
يمكن ساعتها أكتشف
جدوى القصيدة؟!
وبصى شوفى الشمس
فى الناحية البعيدة
بتخبز الماضى

اللحظة أجمل
وأنا لما شوفت ابتسامتك
ارتبكت
وكأني طفل
في شرا به قطع
أضطر يقلع جزمته
اللحظة أجمل
وعنيكي لون الشمس
والدنيا ساقعة
والبرد لأزرق طارح على خدودك بنفسج
بنبيكي ليه دلوقتي؟!

أحضنني
كأن المكان مايسعش غير واحد
وغيري الموضوع
إذا لاحظتيني ارتبكت
واتفرجي ع البحر
وماتسيبش نفسك لهذا الكون
وثوري
البحر مش مالح
البحر ناس استسلمت
يشبهوا لسيزيف
فيه ألف واحد بيبيكي جوا هذا البحر
هما اللي صنعوا الملح!

القبلة الثالثة

وبجس بالضوء الي مدلوق على عنيا

وبسمع نظرتك ليّا

وبابكي على الي فات

والي جاي

وبانده على الموت الحقيقي

مش الموت الي فيّة

..

لولا الظروف
أنا كنت هابني في قلبي روف
بنور أزرق
”ومن العيون في العيون“
هاعرق كتير
بدون لا حركة ولا مجهود
أنا لما شوفتك ليه
بقيت وتر مهزوز في عود
عود خربان

مهزوم أنا ولا حزين بالفطرة؟
يا حبيبتي أنا قلبي نيّ وأطرى
والموت في زوري
والحياة في زوري
وفي عيني مطرة
بامسك في إيديك
بامسك في إيد الموت ولا الحياة؟
وبامشي فيكي
يا طريق مالوش أي إتجاه

بتتعبني المقارنة
ازاي تكون المعاناة بالصغر دا
بتسيب أثر بالشكل دا؟!
وتيجي ايه دي جنب
آثار الحروب ع الشعوب
أو سرطان الرئة؟!
معرفش!
لكن كان الموت ضروري في الوقت دا
وقولولي؟
ازاي بترمو المشاعر في الزبالة
وبتعيشوا عادي بعدها من غير حنين
أو صدام في القلب؟!

القبلة الرابعة

وازاي رضيت

تسكن خراب قلبها

وبنيت بمية وطن وبيياض قلبك

جوا قلبك بيت

ملحوظة:

بياض قلبك

من العجز مش من الطيبة!

لحد امتي هاتكون تسأول في القصايد؟

وازاي ماسكة إيدين وطريق

بتمنح للحياة كل هذي الفلسفة؟

بتمر السنين على نملة عارجة

امتي بيموت الحنين؟
ويقولولي ازاي هايتكتب الكلام المهم بالدارجة؟
وازاي يعيش المعنى في كلام ميّت؟
وازاي يكون الحب عكس النبىذ؟
بتحزن في مكان ع البحر هادي
قولتلي ازاي يكون الحزن
شكله لطيف؟
وبتنكسر بإرادة آلهية
زي الهوا وفرع شجرة نحيف
قولتلي ازاي تبرر
إنكسار نفسك بنفسك

وازاى لجسمك المخلوط
بحرية دخان السجاير
تقيده رعشة مرور ع القديم؟!
بدون إرادة بتقع في غرام
عيون يملكها صاحب ليك
بتترعش، ويبتنفض قلبك
فازاى تكون إنسان سوي
في دنيا مش إنسان سوي؟!
وبتمارس المآسة كأنك بتمارس الحب العنيف
إيه اللي ممكن تديهولك وحدتك غير وحدتك؟!

القبلة الخامسة

يا حبيبتي:
محبك،
لكن أنا لازم أموت دلوقتي.
غنيلي أغنية قبل الموت
يا بنت احظ
ربنا نازل ياخذ روحي
ويسمع أغنيتك!
حبيتك
لكن ماعرفتش أحب العالم
واحنا في القرن الواحد والعشرين
مش عارف أمشي مسالم في شوارع أرض الله!

أو أبكي
من غير ماتطولني سخرية الأخ الاصغر
”بتحب يا حلو؟“
أو أحضن أي
أي ما بتعرف غير أحضان الجنازات
الواقع مكتوب برداءة فيلم تجاري
باهتة يا أرض الرب
ريجة كلور في الحب
ريجة كلور في الحياة
الموت جميل يا حبيبتى
الموت حنين

لكن أحب اعترفلك:
بعد كل هذا الوقت
قلبي لسة بيجيله ضيق في التنفس
لما بيشوفك
قلبي لسة بيحب الحياة
قلبي لسة نبضه رايح جي
قلبي لسة في بكاه الطفولة
ومش مبرر كل دا يا حبيبي
الموت في قلبي والحياة في قلبي
مجهول هنا مجهول هناك يا حبيبي
سيبيني أجرب
يمكن يطلع الدود الأله!

القبلة السادسة

أربع حيطان

وعلبة تبغ كاملة

وصفين من كوبايات التفل

عساكري المهزومين

ودخان سجائري

عامل غبار على كل شيء

وكأنها معركة حقيقية

وكأنها الحرب

إيه اخرة الدرب دا؟

ماعرفش!

إيه الجديد

غير الورق

وأقلام الكتابة

عديمة الجدوى

وإيه الي خلا السؤال ضروري
أما الاجابة مش ضرورية!!

...

فسيبيني أشيل ذكريات
وحشة على قد ما أقدر
وسيبيني أكرهك
واتتمم

بشعر المهزومين
على قهاوي المغمورين
في الأرض
وتخافي من إيه يا حبيبي؟!
إنتي الي منتصرة
وإنتي الي هاتملّي التاريخ

وبرغم دا كله
بطبع إنساني حقير
عديم الكرامة
أنا قلبي مفتوحك
زي ثمرة تين
وزي ما بتأبى الأراضى
تنسى عضام الميتين
مش هاقدر أنساكي!
«ويبقى أنا الانسان بلا عضم أندفن جواكي»
أنا الغريب في الأرض الجديدة
ومنسي في أرضي

أفتحوا اوضتي القديمة
هتلاقوا قمصاني الي متغاظة
هتلاقوني باصص على نفسي
والكلمة الحزينة بتتخلق
من تحت إيدي
وفي عيني انتصار الآلهة
دلوقتي بس عرفت
أنا خالق الأجساد
بعي فيها حزني
الي صرصر من جنابي
أخرجوا مالكمش
إنكم تنتصروا على أي شيء
أستجدوا عطف الناس
استجدوا عطف المهزومين زيكم
وعيشوا منكسرين
لأنني كتبتلكم كدة.

القبلة السابعة

بوجه عام
الحياة مهنة مش شريفة
سيداتي سادتي
حاضري المآسة في أولها
فاهمي الكلمة وتأويلها
لما أقول النكتة أبقوا أبكوا
وأما أوريكم مكان بلدي على جسبي
أضحكوا
ممنوع من الخروج
م الذاكرة
ناقص كمان يمينعوا
سفرنا في كوبيات الشاي والسجائر
آخر ما تبقى من نضال ع الأرض

والبرد في قلبي وفي الأيام
حتى في الاحلام تلاقي البرد
وماعدتش الكتب بتداوي شيء
ولا عادلي صديق أوفى من المآسة
وقالوا في الامثال
كل هم إلى زوال
بس الي أدركناه يزول ازاي؟!
.....

كان واضح من الأول
إن البنت الي بتلعب استغماية
في شارعنا
هاتسيب كل المخايئ
وتستخبي في قلبي
قلبي الي عريان
فتتلغي فروق الزمان والمكان
كما في القصايد
وامشي في مكان لونه على ذوقي
وفي كل خطوة زمان مختلف

وفي أول مسار منحرف
أقع على جدور قلبي في شارعنا
هو كان لازم أروح بيتنا
رقبتي الي مكسورة
بدل قلبي
عشان يحسوا في محتاج
أقع في اوضتي يومين؟!

ولا كان لازم نكون في الشتا
عشان يكون منطقي
إني أموت م البرد
محتاج لحد
لما أقوله أحزن عليـة
يحزن بدون أسباب
أنا النحيل:
ماملكش تمن رصاصة لأنتـحار
ومن قلبي طالع بخار
بركان في قلبي
ولا حبيبتـي بتـشرب شاي؟!

القبلة الثامنة

يا حُب
شوفت الحياة قصرت
قولت تساعدها
ولا انت مستمتع بوجع القلب
أم عزرائيل اشتكالك عن عجزه
في انتهاء مهامه
عشرين سنة
ولم يبعث كيوييد سهامه
يا حُب
أصبحت اصعب من الشعر الحقيقي
في الكتابة والتواجد

وانا بطبعي رومانسي
ويعمل ايه الي زي
إذا كان لا يملك بنت
الي زي اخره يغني للقمر
يحكي عن الولد الي ماشي
على رجل قلبه وحافي
جلده بيشلب غنى
ملّت كتافي الوجع
او تعب الوجع من كتافي
يحضن حبيبته في القصيدة
ويترعش لوحده في اوضته

كأنها فضّت بكارته

وينتشي

أو

يبتسم من فكرة في دماغه

او يشوف نفسه

في مراية السواق مايعرفهاش

اقسم كان فاكرها حد جنبه!

ساعتها بس قام

وكسّر كل مرايات المكان

ولما سألوه عن السبب

قال لهم:

ماحبش الماضي

يومها رجع بيتهم
وجسمه بيشلب دم
وكان مبتسم جداً

..

شاعر زمان قاللي:
مش عاوز قصيدتي عن العصافير
تعبّر عن الدنيا
ياريتها بس تعبّر عن العصافير
يا حُب
مش بستعطفك لكن
قلبي اللي شرب الدنيا

قبل ما يشرب حبيبته.. شرق
وزهق بكل ما في الكلمة من مباشرة
وصحي الي آمني وخدني من إيدي
وقعدني بينه وبين حبيبته
اقراهم قصيدة شعر
واخلقلهم حالة رومانسية
انا صحيح وافقت
لكني وقتها ما قولتلهمش شعر
وقتها تحديدأ وانا قاعد ما بينهم
قولتلها هي قصيدة شعر
ورروحت بيتنا وبكيت

القبلة التاسعة

تقدر تقولي:

يعني إيه تطاردك الفكرة الحزينة

كأنك لص

تقوم تجري

فاتشكنك افكارك الباقية

وتقع في نص

دماغك

لو غمضت هاتشوفها أوضح

ولو فتحت تتجسد أمامك

وازاى سعيد أيها الشاعر
وفيه جوة قلبك بنت
وفيه جوة قلب البنت مش شاعر؟
مين الي يكسب
الي عاش اللحظة
ولا الي دُونها؟
الي باس حبيبته على القهوة
ولا الي نام معاها في القصيدة؟
اللحظة الوحيدة الي حيلتك
بصيت وراك
لاقيتها بتعدي

نده عليك
الشاعر الأشول
إذا كان لا بد تمسكها
ماتمسكهاش بدراعك الشاعر
ولم تسمع
وازاي سعيد أيها الشاعر
الشاعر الأشول
والقارئ الاعمى
القارئ الكذاب
بيتمشى في قصايدك
وفي قصايد كل شعراء المدينة

القارئ المتخاذل

نضيف الهيئة

بيتجنب الدم

مدّعي فن البكي والفهم

وازاي حزين وأنت

مازلت بتغني

وبتنطق البنت بتأني

وبتنبسط بأبسط الأشياء

وبتبكي زي

زي المطر؟

لا زي ما بتبكي

شايل في قلبك الأسألة والحزن
قلبك الي بقى أشبه
لحصالة الطفل الفخار
ازاي هاتفرغ
من غير ما يتكسر؟
قلبك حزين
وازاي بتستقوى
على القسوة
وبضعفك حتى حنين؟!
فاكر زمان وقفت تتعاقب قدام جميع العيال
ما بكتش

ساعتين من الألم
وأنت وشك مبتسم وضحوك
ما بكتش إلا عندما حضنوك!
أمرك غريب
يا غريب
إيه الي جرح عنيك
كل هذا الجرح
ومالك كدة وشك كأنه
بتندلق منه ملاحك!
مش قولتلك ماتبصش في عين الساعة تاني
أهو العقرب عمل عملته ولدغك!

وبتجري في كل الجهات
كأنك لسة بتكتشف الحياة
أولاً أنك الوحيد
إلي شايف ساعات حيطان بيتكوا
بتجري وراك
ولا صديق
حكمة قالت:
من وصل أبطئ عرف بتفاصيل الطريق
لكن من وصل أسرع
كان عارف التفاصيل من الأول
والوقت يشبه لكائن بعين واحدة
عين واحدة تقدر تربكك مش عينين
إيه إلي ممكن يقتل الإنسان
غير الوقت والوحدة!؟

القبلة العاشرة

« ١ »

إبريل
وسارح في جسمي
حزين وساكت سكوت الميتين
كأني وعييت دلوقي بس
بالممكن على كتفي
ضعيف وهش
وكاره للحنين والشوق
لمستي حفنة ريح
بعترتني زي ضوء
يارب لمين ألجأ
أخطأ في حقي زمان أبويا وحضني
لكنه للأمانة
أعتذر
والله أعتذرلي
وبالغ في حزنه

حتى هو لحد هذا الوقت
بيكفرلي عن حضنه
صحيح باعتترفلكم:
أنا بالكلم نفسي وأنا ماشي
ومحرك صوابي ع الهوا كداهو
وكأني تحت مني بيانو
وسعات بغمض عيني وأمشي
وأجرب سيرة الاعمى
فكان طبعي
لما عيال الحارة يسموني مجنونها
ومجدفوني بطوب
يتولد احساس نبوة
ولو خيال
وآه م الخيال الي بالنسبة لعجوز
يشبه عيال

ازاي معجزني كدة
وطلعتي خصلة بيضا في قلبي
وآه من عجزي
عايز أبكي
عاجز أبكي
آه لو أوصل
آخر السما وأقطع من القطنه الزرقا دي حتة
وأخرج
أكيد مش هلاقي كون مثلث
أو مستطيل
أكيد هلاقي براح
وروح
وطير من غير جناح

ويدق قلبي زي دُف
أصير أخف
أطير
ماعرفش ميّت ولا حي
زي ضي
أبقى كون
بتنورة
أصنع سيرة اللون
وادور وألف
وألخبط الدنيا وأدور
لحد ما ابقى فولكلور.

«٢»

أنا

لا أؤمن بربط الهندسة بالشعر

وفاشل في حساب سرعة الضوء

من السما لرمشي

بس قلبي

يشبه لنجمة ساكنة في السما

قبل اما يوصل ضيها

بتمشي

لا اريد م الشعر

غير اكون اراجوز

يحوز حبيتي
تننشي من الايقاع المنضبط
والمشي ع الحبل بثبات
لكن هاتبي اكيديدا أنكسر الإيقاع ووقعت
هنا
الصورة أحلى
والإيقاع كداب
كداب إذا قولت إني ما بفرحش
من ذكاء لعبتي
وسقفة الجمهور
لكني صدقاً بتننشي أكثر
من سقفتي

لا أريد م الدنيا
غير الشعر
ومحبة الأرواح
بجيث إذا سابتني حبيبي
في الصباح
ماقطعش شرياني مساءً وأبكي
بل أشرب قهوتي في هدوء
وأكتب قصيدة
أنا لا أؤمن بالمنطقية في النصوص
لكني مؤمن بالعبث
والجنون والرقص
فامتنطرش مني دلالة
لكلمة حبيبي في كل نص
إلا إني مجبها
أو بخاف لا ف يوم
تشوف نص لية فماتلقيش أسمها

فمنين خريف كامل
بتنزف شعر من روحك
ويتكتبه من دم
وتقطع علشان
لم يشاركك حد هذا الهم
ازاي لم تواجه الدنيا وتصرخ في قلب الحرف انطق
ازاي لم تقولهم عن الشعر عن الدنيا البعيدة
كان ضروري نكون كلنا شعرا
لكن مش ضروري نكون كلنا بنكتب قصيدة
إحنا العيال شعرا بالفطرة
أختي بتغيير من أحبال الغسيل إكمنها أقرب للعصافير منها
مدرسات الرسم بتفكرها بيوم العيد
تفرق إيه عن شاعر حزين جداً
في نصه
باغتراب القطر عن وطنه
وكل ما يشوف شنطة سفر بتفكره بالبنت.

القبلة الأخيرة

على سبيل الهزار
هانتحر
هاخد شريط أقراص أي حاجة
ماتكونش ليها علاقة بالأمراض الي عندي
وأنتحر
كان جميل
إني أكون مدرك
إنتهائكم بعدها فوراً
مدرك إني
مش هاكون مدرك
لحزنكم السخيف
وانتوا بتخترعوا القصص
الي بتجمعنا
بتتحولوا فجأة لبتحبوني
مدرك إني مش هاشوف حبيبتي بتبكي
وانتصر مرة

مش هاشوف ندم أهلي
كتابات صحابي على صفحات التواصل
الجميع بيعرفني
الجميع بيود يعرفني
بيود لوليه ذكرى تجمعنا
مش هاشوف كل دا
مدرك كويس
هانتحي
زي مابتخلص سجائري
و ربما شبجي ما يطلعش شاعر!
هانتحر
وانا مدرك لكوني هاتحول أداة
هانسلم م الدنيا دي زي صيف عدى
زي بنت جميلة عديت على القهوة
زي نعناعه في براد شاي
زي ناي من مكان مجهول

هانسحب وأنا مدرك إني
مش هاحس بأي انتصار منكم
وأنا مدرك تماماً إن أئتوا أضعف كثير
من إني أنتقم منكم
لكن « خصومة قلبي مع قلبي »
والحياة أصعب من إنها تتكتب بالشعر
وعن قريب هاتعلم الموت على أصوله
ممکن يكون الموت أسهل من إنه يتكتب بالشعر
وربما شبجي مايطلعش شاعر
هانسحب وأنا متدرب على الضلمة كويس
على الأسود
على إني أكون نعناعة في شفايف حد
أوصبارة على بزاز أمهات بتفطم عيالها
متدرب على الموت وبنط حبله كل يوم
هانسحب وأنا
متدرب على الوقت و الوحدة
وع اليتم
وع المجهول عموماً
ببساطة هانسحب
وربما شبجي مايطلعش شاعر!

مقاطع

نحيب أخير (١)

الدنيا موسيقى
والصبح أهو رّوح
وجميع قمرات الليل بانو
والنّص كمان كان فيه طبقات
وحبيبتى بتكملك احلى بيانو
وانا كان جدي عملي زمان
م النخلة المقطوعة ربابة
واهو مات واهي ماتت
وحياة الجد يا بابا
لا تجيلي بيانو ويكون على قد صوابع إيدها
او اكبر حبة عشان لو تكبر
وحياة الجد يا بابا
لا تسيبك م التكبير في الودن
هارتاح انا اكتر لو غنيت
هارتاح لو يوم خدتني بالحضن

نحيب أخير (٢)

كانت برودة خفيفة
ورشة ايدين مش مخيفة
وورده هناك بتبوح
كانوا كفيف وكفيفة
هاحبوا ايه غير روح!؟

نحيب أخير (٣)

الساعة ستة

الحياة حلوة

قال الماريونت للماريوننته

والدم محبوس في الخشب من آثار الجبل

هل كان لأبن آدم إرادة في الحزن دا

ولا أنتِ بتحييني فعلا؟!

قالت:

إذا كان لأبن آدم ارادة

فالبن آدم نفس الأرادة في التساؤل!

نحيب أخير (٤)

روحي بتنزف
اعزف يالي بُقك ناي
حبييتي بتحب تدي للأمور
طابع فلسفي
إذا قولتلها: مجبك
تقوللي:
الحب ترف إجتماعي
يالي سمعاني بموت
وبتغسلي المواعين
ممكّن أكرهك!؟

نحيب أخير (٥)

أنا ابن عصافير

وفزاعة عصافير

أنا ابن العالم التالت

شوف أعقاب سجائري تعرف خسائري

وبعيداً عن رحلة الثمر الناضج

بدور عن خروج آمن

فهرس القصائد

الإهداء	٥
القضمة الأولى	١١
القضمة الثانية	١٤
القضمة الثالثة	١٩
القضمة الرابعة	٢٥
القضمة الخامسة	٢٩
القضمة السادسة	٣١
القضمة السابعة	٣٤
القضمة الثامنة	٣٨
القضمة التاسعة	٤٠
القضمة العاشرة	٤٣
القضمة الحادية عشر	٤٤
القضمة الأخيرة	٥٠
القبلة الأولى	٥٧
القبلة الثانية	٦٠
القبلة الثالثة	٦٣

٦٧	القبلة الرابعة
٦٨	القبلة الخامسة
٧٣	القبلة السادسة
٧٧	القبلة السابعة
٨٢	القبلة الثامنة
٨٧	القبلة التاسعة
٩٤	القبلة العاشرة
١٠٢	القبلة الأخيرة
١٠٥	مقاطع
١١٠	فهرس القصائد